

光緒吉林通志

吉林通志卷九十四

人物志二十三

國朝八

德勒格爾

穆占

烏丹

明珠 子成德

授敘

固三泰 子明阿圖 孫賽

瑚什布 子穆徹納

阿什達爾漢 子席達魁

蘇納

蘇克薩哈

白爾赫圖

鄂莫克圖

愛松古

喀山 阿布岱

納海

德勒格爾姓納喇氏葉赫貝勒錦台什之子天命四年

太祖攻破葉赫被創家居而錦台什據所居高臺未下奉

命入勅曰我等戰既不勝而城又破居此何爲不如往投言

數四錦台什不從涕泣返報

太宗時爲貝勒令縛之徐曰死則死耳何縛焉於是

太宗以其言轉奏

太祖曰子招父降而不從罪不在子

命入見徹御膳俾與

太宗共食且謂

太宗曰此汝兄也善遇之授佐領子男爵後隸滿洲正黃旗
未幾卒子南禘襲任護軍統領坐事黜削弟索勒和
襲而南禘之子曰穆占曰烏丹

穆占初任侍衛兼佐領順治十六年督前鋒參領隨
都統卓洛前鋒統領伯勒赫圖駐防雲南時元江土
司那嵩作亂大軍滅之與有功擢本旗副都統子輕
車都尉世職康熙十二年逆藩吳三桂反

聖祖命安西將軍赫業副將軍瑚哩布由陝西四川進討穆
占督前鋒統領參贊軍務明年春至陝西開四川郡
邑皆附賊叛鎮譚宏據陽平關同西安將軍瓦爾喀

率兵先驅擊賊野狐嶺敗之攻克陽平關及七盤關
又敗僞總兵石存禮於朝天關陳擒僞遊擊王道成
斬獲無算進征保甯叛鎮吳之茂以賊數萬來拒我
軍與相持數擊敗賊衆來犯者其冬賊劫我糧艘於
略陽又阻截運道於槐樹驛及郿嶺獨以兵通道賊
遇之輒靡旣而餉不繼儲諸將還駐漢中會陝西提
督王輔臣叛甯羌據秦州平涼與吳之茂譚宏等聯
結爲寇隨大將軍貝勒洞鄂還西安十四年春

詔洞鄂征秦州平涼穆占代赫業爲安西將軍率兵並進僞
總兵高鼎以賊四千立寨隴州河岸力戰破其寨殲

賊甚眾進薄秦州圍之賊數出戰敗之又擊卻平涼
援賊城賊困威偽總兵陳萬策以城降率兵往助提
督張勇圍鞏昌遣陳萬策入城諭偽總兵陳科亦率
眾降遣會大軍征平涼明年春

聖祖以洞鄂久圍平涼未下

遣撫遠大將軍圖海代之夏王輔臣降穆占率兵剿餘賊於
西河清水成縣醴縣復其城偽總兵周養民王好問
以慶陽府降其秋

召入覲以都統昂級似征南將軍印率兵征湖南十六年春
至荊州是時順承郡王勒克德渾守荊州貝勒尙善

圍岳州安親王岳樂圖長沙簡親王喇布守吉安

詔由岳州助攻長沙疏請移江南沙船百餘爲水陸夾攻之
用

詔如所請其秋

詔移兵會簡親王規取衡州永州吳三桂分遣賊將掠江西
移兵袁州擊卻賊眾由永新犯吉安者遂進征茶陵
逐賊至攸縣陳斬四千餘級擒百餘人茶陵攸縣安
仁邵縣永甯俱復明年閏三月攻克郴州桂陽招桂
東興甯宜章臨武藍山嘉禾永興降之自乃駐郴州
以都統宜理布守永興俄賊犯永興遣護軍統領哈

克三前鋒統領碩岱等接之時簡親王尙駐吉安請
旨起其進征簡親王奏穆占徹茶陵攸縣安仁之兵還郴州
恐賊由永興進據要路江西可虞請

敕穆占先滅永興之賊疏辦茶陵等處之兵未徹永興已遣
撥郴州實爲要地請

敕簡親王遣將來守臣乃可擊賊永興

皇祖命穆占仍守郴州

諭起簡親王進征簡親王乃移駐茶陵穆占疏請調江西提
督趙賴隨簡親王部下將軍華善等率兵分守攸縣
安仁等處

詔自穆占至荆州所奏謂遣守禦事宜無不允行破賊收疆
穆占是賴其俱如所請夏賊將馬寶胡國柱弁力犯永興
我軍失利宜理布哈克三皆戰沒碩岱退入城副都
統託岱引兵還郴州

聖祖以穆占分兵防守岡地致永興兵單

諭賚厚集兵力立功贖罪時簡親王遣前鋒統領薩克察由
安仁援永興既入城以賊勢猖獗牒請益兵辭以永
興軍事簡親王主之薩克察遣告簡親王遂以入奏
詔賚穆占曰凡因茶陵永興諸處軍事所降諭旨皆署穆占
名於簡親王之前今穆占牒稱永興爲簡親王之地繆戾

質甚自今以往毋分彼此合力以滅賊爲期未幾馬寶聞
吳三桂死焚壘引還衡州初寶等三面圍攻永興自
八月二日至二十日晝夜不息城壞於礮以竹篋布
囊盛土補之且築且戰瀕危者屢矣碩岱等死守十
九日始去穆占遣兵追敗之耒陽十八年春率兵擊
敗賊將郭應甫於常甯招降僞總兵李魁等追擊賊
將吳國貴於永州俘斬甚衆復永州道州常甯新田
永明江華東安進定廣西復全州灌陽興安恭城時
桂林平樂南甯等府將軍莽依圖傅宏烈等復之

詔穆占還定湖南攻復新甯冬

命貝子彰泰爲定遠平寇大將軍穆占參贊軍務十九年春
督兵擊敗賊將吳應麒等復沅州進征貴州冬師進
鎮遠賊將張足法楊應選宵遁復府城及偏橋興隆
二衛進定平越貴陽並遣兵復安順石阡都勻等府
明年春賊將高起隆夏國相王會王永清張足法楊
應選等擁衆二萬餘於平遠西南倚山立寨同提督
趙賴等率兵力擊起隆等敗竄王會以所部降遂復
平遠分遣副都統莽奕祿遊擊王成功等追剿逸賊
擒斬偽巡撫張維堅復大定府應選率衆降尋進征

雲南

聖祖以貴州苗蠻雜處疆土新復

命穆占旋師鎮守既以彰泰請

詔仍隨征雲南其冬合廣西四川兩路兵攻雲南城三桂孫
世璠自殺僞將軍線絨等出降雲南平凱旋授本旗
蒙古都統列議政大臣二十二年春王大臣等追論
征保甯奏軍事不實征平涼不臨陳指揮在郴州推
諉不救永興應處絞籍沒奏上

詔穆占雖有罪其勞績亦多罷任革世職餘罪寬免是年卒
年五十有六

烏丹初以佐領任一等侍衛康熙十一年同學士郭

廷祚視淮安河工決口繪圖還奏

詔河臣於宿遷至清河舊隄外增築遙隄以防衝溢十三年
順承郡王勒爾錦統師湖廣討逆藩吳三桂烏丹奉
使軍中宣

諭機宜既陝西提督王輔臣叛附三桂

聖祖令署副都統領兵駐守太原尋

命署建威將軍移兵潼關至卽鞫華州商州諸賊平之十五
年隨大將軍圖海征平涼賊據城北虎山墩聯聲援
通餉運督兵奮擊大創賊眾遂奪虎山墩俯攻平涼
城葡臣皇懼乞降率數騎入城安撫降眾十七年授

護軍統領時漢中興安尙爲三桂黨所據

詔圖海進征烏丹參贊軍務分兵擊敗賊衆於牛頭山及香

泉其冬圖海入

覲奉

命仍佩建威將軍印暫統大兵明年秋

詔曰爾在朕左右有年稔知朕意應勇果任事參贊大將軍
機宜以立功勳尋隨圖海統師至鎮安縣偵知賊在梁河
關繼將軍佛尼埒進擊與偽將軍王遇隆戰火神崖
敗之渡乾玉河奪梁河關乘勝追勦復興安

命圖海還駐鳳翔烏丹仍以建威將軍分統大兵繼將軍王

進寶征四川疏請

敕西安甘肅兩巡撫速趣運餉至略陽俾克乘時進取

詔如所請十九年春先遣兵斷賊餉道自與進寶擊賊蟠龍山錦屏山諸處大破之遂趨保甯奪浮橋斬關入城擒僞將軍吳之茂張超龍僞總兵郭天眷等時勇略將軍趙良棟亦復成都與王進寶佛尼埒議分兵取順慶重慶佛尼埒既招降順慶僞知府彭天壽等烏丹率兵趨重慶僞將軍楊來嘉彭時亨僞總兵路之雋江有倉等亦率眾降於是達州東鄉太平新甯南江安岳諸州縣悉定旋奉

詔取瀘州與趙良棟會兵進雲南其秋良棟疏請

赦烏丹速珍永甯賊寇乘勝趨雲南

詔曰烏丹往取瀘州行及一月何猶未渡江其速取瀘州剿除犯永甯諸處賊寇既同佛尼埒領兵攻豹子山瀘州賊渡江遁令前鋒統領博爾等擊之擒斬及溺死者無算冬良棟劾烏丹擁重兵二萬不急赴援致永甯再陷仁懷失守得

旨成都去永甯不過七八百里烏丹不速援遲至六十餘日貽誤殊甚以宣威將軍鄂克濟哈統其兵進征烏丹解將軍任還漢中隨大將軍圖海鎮守二十一年還京王

大臣追論遲撥永甯罪革護軍統領及佐領尋授三等侍衛兼佐領二十九年喀爾喀扎薩克台吉額爾克阿海等作亂而噶爾丹亦犯邊掠烏珠穆沁

聖祖命裕親王福全征噶爾丹以烏丹隨征師至烏蘭布通擊敗賊衆噶爾丹遁去裕親王遣同參領色爾濟博爾和岱往偵所在行數日知已遠竄乃還途遇喀爾喀賊衆劫掠並爲所害

卹贈有差烏丹

賜祭葬如故秩大臣又視陳亡例子雲騎尉世職以其子巴

什襲並

命巴什兼襲其諸父噶納海二等男爵雍正二年

世宗命入祀昭忠祠

恩至厚矣時終以故將軍嘗統數萬眾一旦降黜至任偵探之役戕於小賊爲烏丹重惜之也

明珠父尼雅哈德勒格爾之弟也

太祖時授佐領數從征伐有功

世祖定鼎燕京予騎都尉世職順治三年卒長子振庫襲明珠其次子由侍衛授鑾儀衛治儀正遷內務府郎中康熙三年擢內務府總管五年授宏文院學士六年充纂修

世祖實錄副總裁七年奉

命與工部尙書瑪爾賽閱淮揚河工定議修復興化縣白駒場舊閘增鑿黃河北岸引河以備蓄洩授刑部尙書
明年改都察院左都御史十年充

經筵講官奏停巡鹽御史徧厯州縣之例遷兵部尙書
十二年春

聖祖幸南苑

閱八旗甲士於晾鷹臺明珠豫布條教俾之演習及期軍容
整肅

聖祖諭今日陳列甚善可著爲令是年平南王尙可喜請徹

藩移遼東吳三桂耿精忠亦以是請下王大臣九卿等會議有謂三桂當久鎮雲南不可撤者與戶部尙書米思翰刑部尙書莫洛堅持宜撤遂以兩議上

詔從明珠等議十四年調吏部尙書十六年授武英殿大學士先是吳三桂反大學士索額圖謂因撤藩激變宜罪議撤諸臣

聖祖弗許及耿精忠降尙可信死吳逆殄滅

聖祖詔廷臣以前議撤藩惟明珠與米思翰莫洛爲能稱

旨云二十一年王大臣等議耿精忠及其黨會養性等二十餘人罪狀擬如律

詔詢廷臣欲量子寬減明珠奏耿精忠罪浮於尙之信之信
縱酒行凶口出妄言精忠負恩謀反悖逆尤甚法在
不赦

詔又以逆黨多人尙宜矜釋奏惟陳夢雷金鏡田起蛟李學
詩可寬

聖祖仍命王大臣集議俱如明珠言於是陳夢雷四人免死
入旗爲奴耿精忠曾養性等咸伏誅是時

詔重修

太祖

太宗實錄及編纂

三朝聖訓

政治典訓

平定三逆方略

大清會典一統志明史皆爲總裁官兩遇

實錄告成加太子太傅晉太子太師二十七年御史郭琇疏
劾其與大學士余國柱背公營私諸款一凡閣中票
擬俱由明珠指揮輕重任意余國柱承其風旨卽有
舛錯同官莫敢駁正

聖明時有詰責漫無省改卽如陳紫芝參劾張汧疏內請議
處保舉之員

上面諭九卿應一體嚴處稟擬竟不之及一明珠凡奉

諭旨或稱其賢則云由我力薦或稱其不善則云

上意不喜吾當從容挽救且任意增減以市恩立威而要結

羣心挾取貨賄至每日奏畢出中左門滿漢部院諸

臣及其腹心皆拱立以待密語移時

上意無不宣露部院衙門稍有關係之事必請命而行一明

珠連結黨羽滿洲則佛倫格斯特及其族姪富拉塔

錫珠等漢人之總攬者則余國柱結爲死黨寄以腹

心凡會議會推皆佛倫格斯特等把持國柱更爲之

覆案惟命是聽一督撫藩臬缺出國柱等無不展轉

販鬻必索滿其欲而止是以督撫等官愈事剝削小民重困今天下遭遇

聖主愛民如子而民間仍未給足皆貪官搽索以奉私門所致也一康熙二十二年學道報滿後應陞學道之人率往論價九卿選擇時公然承其風旨缺皆預定由是學道亦多端取賄士風文教因之大壞一靳輔與明珠余國柱交相固結每年河工糜費大半分肥所題用河官多出指授是以極力庇護當下河初議開時彼以爲必任靳輔欣然欲行九卿亦無異詞及

上欲別用人則以于成龍方膺

聖眷舉之必當

上旨而成龍官止臬司可以統攝於是議題議奏仍屬靳輔此時未有阻撓意也及靳輔張大其事與成龍議不合始一力阻撓皆由倚託大臣故敢如此一科道官有內陞出差者明珠余國柱率皆居功要素至於考選科道既與之訂約凡有所陳必先行請問由是言官多受其牽制一明珠自知罪戾見人輒用柔顏甘語百計款曲而陰行鷲害意毒謀險最忌者言官恐發其姦當佛倫爲總憲時見御史李興謙屢奏稱

旨御史吳震方頗有參劾卽令借事排陷聞者駭懼以上各

款但約略指參總之明珠智術足以彌縫罪惡又有
余國柱姦謀附和負

恩之罪罄竹難盡伏祈

憲威立加嚴譴天下人情無不欣暢疏奏

聖祖念平定三藩贊理軍務與有功罷其大學士餘降黜有
差而疏留中尋授內大臣二十九年裕親王福全統
兵征噶爾丹

命與領侍衛內大臣索額圖參贊軍務坐噶爾丹敗遁不行
追勦降四級留任三十五年

聖祖親征噶爾丹遣與左都御史于成龍督運西路軍餉尋

以噶爾丹敗遁班師明年

聖祖復親征扈從至甯夏奉

命撥駝運餉又偕大學士黃茂齋金頌賞鄂爾多斯從征兵士師還復原級四十三年

命與內大臣阿密達賚山東河南流民就食京師者四十七年以疾卒年七十有四

聖祖遣皇子奠茶酒

賜祭葬如故事子揆敘自有傳成德字容若後更名性德稱者仍從其初年十九舉康熙十二年進士官侍衛故精騎射管扈從出塞及

南巡非所好也時謝病家居與遊多知名士風裁玉立嫺吟
詠尤工倚聲世稱其令曲勝於漫序得李後主眞派
焉又家世貴盛每一出車服輿馬麗都所至禮下之
見者疑神仙中人善無錫顧舍人貞觀而吳江吳兆
騫謫戍甯古塔得

賜環與有力焉早卒著有通志堂集飲水詩詞集又彙刊唐
宋以來說經之書曰通志堂經解凡數千卷自所著
周易粹言八十卷禮記集註考誤三卷亦附入其後
皇清經解續經解並因之故論者謂非僅以詞章者家名
也且有功經學

授敘字愷功初任佐領康熙三十五年由二等侍衛
特授翰林院侍讀明年充

日講起居注官三十九年遷侍讀學士四十一年冬扈
從至德州既

駐蹕與學士陳元龍等奉

召入行宮

命各呈所書字

論以臨摹之法諸臣請贖

御書

御書大字示之尋擢翰林院掌院學士兼禮部侍郎明年

命冊封朝鮮王妃還教習庶吉士充

經筵講官四十七年遷工部右侍郎其冬

聖祖以皇太子旣廢

召滿漢文武大臣集

暢春園

詔卽諸皇子中舉奏一人諸臣莫敢言揆敘與領侍衛內大臣阿靈阿散秩大臣鄂倫岱尙書王鴻緒議示意諸大臣書入阿哥三字於紙入奏

命再盡心詳議明年春復

召諸大臣

詰先舉允禩者爲誰諸臣莫敢對

詰再四羣指都統侯巴琿岱

聖祖曰朕知之矣此事必佟國維馬齊以當舉允禩示意於眾眾乃依阿立議耳馬齊奏實不知

聖祖復問大學士張玉書玉書奏會議日大學士馬齊先臣到班臣問所舉爲誰答云眾意欲舉允禩遂相與奏聞於是

命罷馬齊職

詰責佟國維五十年揆敘轉工部左侍郎明年遷都察院左都御史仍掌翰林院事五十三年疏請禁小報曰近

聞各省提塘及刷寫報文者除科鈔外將大小事件
采聽寫錄名曰小報任意捏造駭人耳目請嚴行禁
止庶好事不端之人有所畏懼下部議行揆敘蓋知
民可使由之及不見異物而遷焉罔其步趨必一其
耳目乃小報所濫觴有什百千萬之者且視爲固然
又軍國秘議廷臣或未及知他邦已輸於誰何而逆
爲之所機事不密則害成可弗虞哉五十六年卒

賜祭葬如例諡曰文端初皇太子之廢儲位久虛檢討滿洲
朱天保憂之具疏略言皇太子雖以疾廢其失由左
右非人習於驕抗若遺碩儒名臣輔導之潛德日彰

猶可復問

安視膳之事儲位重大未可輕移恐生藩臣覬覦則
天家骨肉之禍有不可勝言者疏入

聖祖歛歔久之阿靈阿進曰朱天保之疏希異日寵榮耳
聖祖大怒遂置之法其父兵部侍郎朱爾訥亦荷校死

固三秦姓納喇氏葉赫貝勒錦台什族人蓋疏矣不
知於德勒格爾何輩行

太祖時率屬來歸任佐領尙主封固倫額駙後隸滿洲鑲藍
旗從征明廣甯單騎馳入敵陳縱橫盪決被數創戰
愈力大軍繼之遂敗敵兵

特子男爵

太宗嗣統設八大臣以木旗都統與其列天聰元年隨大貝勒阿敏征朝鮮有功迨月凱旋

太宗郊勞之優以殊禮三年

太宗親統大軍攻明遵化固三秦以本旗兵自城西南隅拔之明年大軍取永平明兵潰走昌黎

太宗遣敖漢奈曼巴林扎魯特兵攻其城不克

命同都統達爾漢等率兵往助尋以城守堅

命撤兵因焚近城廬舍而還復受

方略征明深州先令參領高鴻中庫爾禪以二十人誘敵啟

門大軍突入遂克之籍其倉庫金穀以

開五年

太宗幸文館閱館臣達海所譯武經因

詔羣臣曰古來爲將帥者必體恤士卒朕聞額駙固三泰與敵交鋒士卒戰死者輒絕繫其足曳歸輕蔑士卒若此何以得其死力尋以不能鈐束士卒不諳機務

命解都統任九年

詔免功臣徭役與馮並增

賜人戶俸專管佐領事

世祖定鼎燕京

加恩優賚尋卒子明阿圖初任佐領大兵入山海關以署副都統爲軍殿有功順治二年子雲騎尉世職任都察院理事官四年考滿晉騎都尉六年

特授本旗蒙古副都統兩遇

恩詔晉輕車都尉八年卒長子闕柱襲次子賽弼翰初爲簡親王濟度護衛康熙四年授護軍參領十三年隨護軍統領瑚哩布討逆藩吳三桂由陝西進軍四川攻克陽平朔天兩關趨保甯叛鎮吳之茂王輔臣等遏餉道乃退駐西安十四年隨瑚哩布攻復秦州明年王輔臣降師旋被

優資十七年鄭錦犯福建陷海澄長泰

詔增遣八旗兵赴福建以賽弼翰爲營長同諸參領率之往
明年錦將劉國軒吳淑何沛等犯漳州結壘郭塘歐
溪頭進奪江東橋隨平南將軍賽塔逆戰連挫之毀
其壘斬殪無算二十年隨賽塔由廣西趨雲南討逆
擊吳世璠敗賊將何繼祖等於石門坎黃草壩遂與
四川貴州兩路軍會平定雲南二十二年擢木旗蒙
古副都統二十四年調滿洲副都統論功授騎都尉
世職二十九年卒

賜祭葬如故事

瑚什布姓納喇氏亦錦台什族人

太祖時來歸任佐領後隸滿洲鑲藍旗大貝勒代善所屬阿
山阿達海自負材武未見任用率屬他往瑚什布隨
貝勒阿敏追之射殪阿山二子旣阿山阿達海入明
邊無所遇久之仍來歸瑚什布尋任侍衛兼參領天
聰二年從征通古索爾和部身被七創戰益力卒斬
其渠率論功子騎都尉世職八年從征明大同偕前
鋒統領圖魯什等擊敗其總兵祖大弼軍進攻萬全
左衛其總兵曹文詔遣軍迎戰設伏要擊擒四人斬
三十餘級九年擢本旗蒙古都統崇德元年隨武英

郡王阿濟格征明越燕京攻定興縣克之師還坐出
邊時不束步伍又不殿後殞士卒十人削世職罷都
統專任佐領仍罰鍰三年授理藩院副理事官順治
四年復世職三遇

恩詔晉二等輕車都尉未幾卒子泰庫襲次子穆徹納順治
三年以護軍校隨豫親王多鐸討叛人騰機思擊敗
喀爾喀兵擢護軍參領六年隨英親王阿濟格征大
同叛鎮姜瓖擊偽總兵劉偉思敗之進攻甯武關賊
將宣孟臣來接偕護軍統領藍拜擊敗其眾又敗賊
吳家峪十一年隨靖南將軍珠瑪喇征廣東與李定

國踐新會勝之初以本官三遇

恩詔子世職騎都尉兼一雲騎尉至是論功晉輕車都尉十

三年卒子薩爾圖襲

阿什達爾漢姓納喇氏後隸滿洲正白旗葉赫貝勒

錦台什從弟

滿洲名臣傳謂錦台什族兄弟之子開國方略錦台什語我使云汝

皇子四貝勒我妹所生八旗滿洲氏族通譜稱

阿什達爾漢爲

太宗諸舅則族子

之說殆誤據二書正之

太宗諸舅也

太祖初年滅葉赫率所屬來歸授佐領天命六年從征明園

攻奉積堡鼓而進入旗諸將無出其前者進攻遼陽

城又先登克之論功授一等輕車都尉世職

賜敕免死一次

太宗嗣位

命典外藩蒙古事嘗奉使朝鮮並齎

敕諭歸附蒙古諸部稱

旨天聰六年明遣使議和

太宗命與文臣白格龍什等報之議既定誓告

天地其辭曰明與滿洲二國共圖和好謹以白馬烏牛誓告

天地若明先敗盟

天地厭之統絕國亡若滿洲先敗盟

天地亦厭之統絕國亡兩國若遵守誓言永以和好

天地眷佑世世子孫長享太平盟畢燔其書明使以和好禮
成齋黃金五十兩銀五百兩蟒緞五百疋布疋疋爲
盟辭之賸既歸白格以與龍什等私取明餽遺事奏

聞

詔奪所取入官七年隨貝勒濟爾哈朗薩哈璘鞠獄蒙古部
所齋

敕諭二十道失其九所司奏劾論罰尋宣布

欽定律令於蒙古諸部八年奉

命徵兵科爾沁會大兵於宣府左衛時

太宗親征察哈爾其汗林丹遁走海上殂於道所部潰散其

屬額爾德尼

與姓納喇氏者同名

囊蘇等率眾來降

命與前鋒統領吳拜等挈額爾德尼囊蘇往偵林丹子額哲
去就以其台吉塞冷等還奏曰察哈爾大臣若祁他
等率千人而來者踵相接也旋

命至春科爾大會蒙古諸部分畫牧地使各守封疆復與諸
貝勒訊獄定罪還報稱

旨令專一佐領事九年隨貝勒多爾袞等率兵萬人往收察
哈爾汗林丹子額哲師抵托里圖貝勒等遵

太宗所授方略遣偕其族孫護軍統領南褚先詣額哲母營

額哲母南褚女兄而阿什達爾漢族孫女也既見說
之降額哲遂從其母舉部來歸先是我軍未至有鄂
爾多斯濟農圖巴者來招額哲與盟而去察知其事
慮有反覆追濟農圖巴羈留之令還察哈爾所以貨
鄂爾多斯者墮其好又率兵略明宣大界至山西多
所俘獲凱旋

太宗親迎勞焉崇德元年授都察院承政

太宗御崇政殿侍臣巴圖魯詹額爾克戴青後至廷責之曰
爾扈從臣也乃不肅先入侍叱出之於是臺網舉而
百僚亦識所職守旋偕文臣希福往察哈爾喀爾喀

科爾沁部明刑申禁其冬從征朝鮮國王李倬走南
漢城豫親王多鐸率師追圍之其巡撫合兵萬八千
來援分樹二柵悉眾出戰偕貝子碩託率驍銳逆擊
大破其軍其副將以兵五千營山麓爲聲援者遣百
人沿河下覘馳殲之復攻其營餘眾皆潰明年正月
李倬降論功晉男爵世襲會遣大臣往科爾沁巴林
扎魯特喀喇沁土默特等部頒

赦詔並會諸外藩清理刑獄

命爲正使三年部議以前往科爾沁部察審失實且於諸藩
貝勒有所受應削職

詔寬贊解任追所受入官俄復任都察院承政五年與參政

祖可法等疏陳時事略曰

皇上欲恢張治道深思篤行之今諸國景附

朝廷清明而諸王以下至都統彼此觀望顧念身家莫

肯精白一心爲

國陳奏不知果無可言耶抑有所畏忌而不敢言耶夫
刑法者所以防民之姦也猷於法則屬於刑此不可
宥也今刑部斷獄不依本律或從重論輒削其職臣
思諸臣經戰陳出死力

恩授一官一旦有過其可不論重輕而遽革之乎先所簡選

議事十人既不稱任卽宜罷之又故事職官陳亡者
子孫襲兵士陳亡者妻受賞今未盡行惟

聖主裁察疏入

太宗嘉納之六年大軍攻明錦州其經略洪承疇集眾來援

陳師松山

太宗親統大軍擊之明師宵遁

太宗合眾圍松山明總兵曹變蛟營乳峯山堅壁不出一夜
棄山寨率步騎直犯我中軍入

御營時右翼大臣侍衛等俱未歸伍軍中大驚將士以死禦
之始退

太宗以其爲故舊大臣受心膂寄宜常侍左右是夜反安處帳中不至

御前防護斥歸本旗七年諭松山失律諸臣罪罷承政降世職爲騎都尉尋以疾卒年六十三子三席達禮襲世職阿什達爾漢遜事

本朝戰陳有勇且時昌言其初則亡國裔也豈亦若百里奚之愚於虞而智於秦耶用不用耳當是之時諸部若烏喇輝發哈達暨葉赫各酋人低首下心入爲臣僕粥粥若無能洎乎佐

定天下野戰攻城又毅然以才武見視阿什達爾漢將母同

然則有國家者其可使累世所畜淪於草澤留爲他人資驅除耶席達禮初任佐領天聰三年從征明燕京五年從攻明大凌河城六年從征明先覘大同並有所獲其夏從征察哈爾備副都統雅賴以二十人先驅敵伏兵三百竟擊敗之崇德元年從征朝鮮戰勝桃山村三年從貝勒博洛征明擊其內監馮永盛兵五年同都統圖爾格圍歸錦州並有功既襲父職兼一雲騎尉順治四年擢理藩院侍郎仍管佐領事晉世職輕車都尉七年遇

恩詔晉世職二等坐事仍降如故又再遇

恩詔晉世職一等加太子太保康熙三年卒

賜祭葬如典禮其族人先阿什達爾漢歸

命者曰蘇納

蘇納當

太祖華業初卽棄兄弟來歸

命尙主爲額駙編所屬人戶任佐領亦隸滿洲正白旗天命

四年

太祖旣滅葉赫

命收其親屬悉領之蘇納於葉赫屬則疏矣又預護

天眷所在爲武庚不可爲王哀不必事近微子而知幾爲尤

先用是克保其宗世祀亦不墜此不得與反顏事變者同類而共笑之也十年授參領數從征伐有功

賜敕免死四次尋擢副都統天聰元年

太宗親征明錦州以大貝勒莽古爾泰等別率師衛塔山運道

命蘇納統八旗蒙古精兵扼塔山西路敵兵二千來窺領壽逆賊敗之乘勝追擊俘斬無算獲馬百五十餘

賜所俘獲以犒其軍三年同都統武納格率精兵八千及蒙古軍征察哈爾降其邊境二千戶既聞降者謀叛歸明於是悉誅其男子釋二台吉俘婦女八千有奇還

以所獲

頒賜從征將士有差旋有

旨責其殺降奪所給牲畜尋以蒙古人有自察哈爾逃入明者奉

命同武納格以百騎追躡捕獲如其數驅馬駝牛羊以歸五年授護軍統領擢兵部承政從征明大凌河城擊敵兵出戰者並錦州援兵悉敗之論功授騎都尉世職八年考滿晉世職輕車都尉

命免徭役專管佐領九年坐隱匿丁壯削世職旋授正白旗

蒙古都統崇德元年隨武英郡王阿濟格征明攻雕

鴨長安諸嶺及昌平等城五十六戰皆勝又偕步軍
統領薩穆什喀攻容城縣克之比還以先眾出邊致
後隊爲敵所敗坐奪俘獲罰鍰從征朝鮮其邊將率
步騎千餘來接備副都統吳塔齊等要擊大敗之陳
擒其將二年法司議朝鮮國王朝謁時亂班釋甲又
擅離大軍徑歸坐罰鍰三年以都統阿山之子塞赫
爲正藍旗洪科訐其臨陳退避鞠訊不實徇洪科證
其事坐罰鍰罷都統任仍專管佐領事順治五年以
疾卒

世祖念爲勞績舊臣追復世職子蘇克薩哈時亦累功授騎

都尉世職令並襲之

蘇克薩哈初署佐領崇德六年從鄭親王濟爾哈朗圍明錦州敵兵出戰敗之

太宗聞明經略洪承疇以兵十三萬赴援

親統大軍至環松山列營敵兵遁走同護軍統領漢岱追敗其眾於塔山翼日又追擊於海岸從豫親王多鐸設伏擊斬杏山兵之潛遁者論功授騎都尉世職順治元年從入關二年晉世職輕車都尉五年父蘇納卒

世祖念其於

大初

太宗朝屢著功績坐事削輕車都尉世職

特詔復之以蘇克薩哈並襲爲男爵八年列議政大臣九年

再遇

恩詔晉男爵一等兼一雲騎尉府親王多爾袞薨於獵所故
隸其屬下因與王府護衛詹岱等首其殯服違制及
謀遷永平諸逆狀。

命諸王大臣質訊皆實論如謀逆律攝鎮白旗將軍統領十
年流賊張獻忠餘黨孫可望竄湖廣奉

命同甯南靖寇大將軍陳泰等率禁旅出鎮湖南與經略洪
承疇合師進勦十二年賊帥劉文秀與盧明臣馮雙

禮等水陸六萬分犯岳州武昌常德我軍六戰皆捷
雙禮被創遁明臣赴水死文秀走貴州事詳陳泰傳
明年論功晉二等子爵任領侍衛內大臣加太子太
保十八年正月與索尼及遏必隆鼉拜受

願命爲輔政大臣奉

聖祖嗣統索尼故

四朝舊臣遏必隆鼉拜皆以公爲先蘇克薩哈爲內大臣鼉
拜功尤多意氣陵轢人尤憚之蘇克薩哈以額駙子
入侍

禁廷承

恩眷奉

遊詔輔政名亞索尼與鼉拜稱姻姪而論事多與之迂積以成讐索尼亦惡蘇克薩哈會鼉拜欲令鑲黃旗與正白旗互易屯莊索尼贊成之過必隆不能止於是圖換令下旗民皆不便康熙五年大學士兼管戶部尙書蘇納海坐撥地遲誤總督朱昌祚坐阻撓罪皆論死

聖祖覽部議

召詢羣臣僉曰宜如議獨蘇克薩哈不對

聖祖因不允鼉拜卒

詔並予棄市未幾索尼死鼉拜益恣蘇克薩哈以力不能過
居常怏怏六年

聖祖親政

詔議加

恩輔臣以示酬庸之典因奏言臣才庸識淺蒙

先皇帝眷遇拔授內大臣早夜悚懼恐負

大恩當

先皇帝上賓之時惟願身殉以盡愚悃不意恭承

遺詔列於輔臣分不獲死以蒙昧餘生勉竭心力以圖報稱

不幸年來身攬重疾不能始終效力於

皇上之前此臣罪無可逭者也茲遇

皇上躬親大政伏祈

睿鑒令臣往守

先帝陵寢如綫餘息得以生全則臣仰報

皇上豢育之微忱亦可以稍盡矣疏上

詔下議政王貝勒大臣曰蘇克薩哈奏請守

陵如綫餘息得以生全不識有何逼迫之處在此何以不得

生守

陵何以得生其會議具奏王貝勒等以大臣怨望奏請逮治
鼇拜與其黨大學士班布爾善等謂其不欲歸政文

致之構罪二十四坐姦詐欺飾存畜異心論如大逆
應與其長子內大臣查克旦皆磔死餘子待衛穗黑
塞黑里郎中那賽塞克精額達器德器孫倭克札兒
弟之子圖爾泰海蘭皆斬決籍沒族人前鋒統領白
爾赫圖侍衛額爾德烏爾巴皆斬決獄具入奏

聖祖知釐拜素與有隙構成其罪

詔所議未當卻其奏釐拜攘臂

聖祖前強奏累日卒坐蘇克薩哈處絞餘悉如議八年釐拜
敗

詔曰蘇克薩哈雖有罪不至誅滅子孫此皆釐拜挾讐傾陷

深爲可閔白爾赫圖等無罪誅戮亦殊冤枉其蘇克薩哈及白爾赫圖等官俱應給還尋復蘇克薩哈原官及子爵命其幼子蘇常壽襲之

白爾赫圖於蘇克薩哈蓋疏屬也徒以功多爲納喇氏之望釐拜伎焉故連坐時尤冤之初以前鋒校累功授兵部副理事官崇德六年從睿親王多爾袞圍明錦州敵出犯我左翼偕前鋒參領鄂碩戰卻之又擊敗杏山敵騎六年偕前鋒統領吳拜參領瑚密色等數擊敗明經略洪承疇兵於松杏兩山間明年自錦州分兵略甯遠所獲多任前鋒參領順治元年從

入山海關擊流賊李自成偽總兵唐通於一片石大敗之又連敗之安肅望都斬獲甚夥燕都既定從豫親王多鐸西勦自成破賊營者再攻克潼關明年移師江南徇蘇州擊走明巡撫楊文舉獲其船二十餘進征杭州擊敗明大學士馬士英之眾分兵徇湖州偕前鋒侍衛安泰圖色等攻下之三年從端重親王博洛敗敵於金華八步嶺進定福建五年從鄭親王濟爾哈朗征湖南以本旗前鋒破敵湘潭進軍寶慶敵眾迎戰偕都統拜音岱擊敗之克其東門敵於城外結九營將復來犯敵負水而陳力戰久之潰溺水

死者無算尋自武岡進征沅州數敗敵敵遁進定全州其摧鋒而前連所攻破則明桂王朱由榔之總兵王進才馬進忠袁宗第也凱旋被

優賚八年隨都統阿喇善征山東土賊至沂州攻破蒼山賊斬賊首劉進張齊又搜討附近山寨斬賊首趙三元楊大成應科等明年改護軍參領累功予騎都尉世職兼一雲騎尉三遇

恩詔晉一等輕車都尉十三年擢前鋒統領十五年隨信郡王多尼征貴州時桂王朱由榔據雲南令其將李定國白文選劉正國賚名望等扼貴州要隘大軍至安

莊衛正國以眾迎戰偕護軍統領布葉錫禮擊敗其眾斬正國於響水橋先驅渡盤江會大軍克雲南城明年以所部進攻玉龍關文選引去追擊敗之獲其鞞昌王金印象三馬百四十擒總兵呂三貴大軍取永昌府渡潞江定國設伏磨盤山我前鋒既深入伏起下馬據石立連發三矢殪三人皆洞餘眾皇駭會後軍繼至合擊殲之名望以木柵拒守率眾破之斬名望進取騰越州定國文選奉由榔遣遁追逐踰南甸而還信郡王班師偕都統卓羅留駐雲南定國既走孟艮復圖內犯約降將高應鳳爲內應以由榔印

劄誘元江土司那嵩倡叛同卓羅率兵攻破其巢那
嵩死斬應鳳於軍事詳卓羅傳十七年以在滇久著
勞績

賜衣服鞍馬及金明年隨定西將軍愛星阿征由榔於緬甸
既會師木邦先進至錫箔江文選毀橋道結筏以濟
大軍次舊挽坡以百人往蘭鳩江濱取緬甸所獻由
榔及其親屬至軍凱旋康熙元年奉

詔同都統卓羅率前鋒軍還京論功晉一等男爵六年緣蘇
克薩哈爲釐拜所搆坐死八年昭雪之追復原官及
一等男爵子白爾肯襲爵十年他子一等侍衛羅鐸

參領塞赫訴陳征雲南功抑於釐拜未敘

詔下其事晉爵子並

賜葬如典禮諡曰忠勇

鄂莫克圖姓納喇氏世居葉赫不知其系於錦台什
遠近矣

太祖時來歸任護軍校後隸滿洲正藍旗天聰元年大軍征
朝鮮隨副都統阿山等攻克義州城夏從

太宗親征明甯遠其總兵滿桂於城東二里列陳以拒偕諸
將擊之殲敵無算三年隨貝勒岳託征明大同攻保
安州先登克其城

賜號巴圖魯積前功授輕車都尉世職任參領八年隨步軍
統領巴奇爾等征黑龍江虎爾哈部崇德二年隨都
統葉克舒征卦爾察功並最明年授兵部理事官秋
隨睿親王多爾袞征明自青山口毀邊牆入薄燕京
敗其內監馮永盛兵攻克臨潼關略地至濟南府三
年春班師偕啟心郎先還奏捷

太宗尋遣使與明議和

命同前鋒參領努山等率兵護之五年擢前鋒統領從圍明
錦州其總兵祖大壽逆戰先諸將擊敗之遂北至城
濠明經略洪承疇自松山來援爲大軍所敗要擊餘

眾於筆架山多所斬獲既而承疇集兵十三萬分據
杏山乳峯山

太宗亦親統師至營松杏兩山間斷敵糧道敵兵夜自杏山
遁而步兵走塔山先後邀擊並勝七年從圍杏山分
兵略遼遠多獲牲畜明總兵吳三桂以兵六百躡我
後擊卻之尋益兵來窺我營出戰大捷窮追至連山
乃還敵騎五十自沙河犯我牧地復往擊敵走逐之
並敗其援兵四百錦州既下晉世職二等順治元年
隨睿親王多爾袞入山海關擊流賊李自成追敗之
安肅及望都尋率前鋒兵徇山西殲流賊絳州渡口

明年隨英親王阿濟格征陝西破賊延安自成走湖
廣追之至安陸再敗之獲戰艦三十是年論入關功
晉世職一等三年隨肅親王豪格征張獻忠道出漢
中擊叛鎮賀珍敗之進勦獻忠於西充連破賊眾以
功兼一雲騎尉七年九年三遇

恩詔晉爵一等男十一年授本旗滿洲副都統越二年致仕
康熙十二年卒年七十有八

賜祭葬如故事子緯世琦襲爵而葉赫有曰愛松古曰喀山
並納喇氏其系亦未之詳也

愛松古姓納喇氏葉赫人天命四年來歸

太祖數從征伐後隸滿洲鑲白旗崇德四年

太宗命偕察漢喇嘛等赴明邊殺虎口互市尋

遣往科爾沁調教漢奈曼扎魯特吳喇忒諸部兵征明三年

初設理藩院

命爲副理事官冬自歸化城遊厄魯特部長墨爾根戴青來
歸四年

詔率巴林吳喇忒兵追捕逃人中途輒歸論死

命從寬責之仍供職六年從大軍圍松山明經略洪承疇遣
軍夜走理藩院官屬未偵報又不邀擊坐責仍罰鍰
順治元年擢任佐領隨都統葉臣等征山西流賊李

自成西遁偽伯陳永福據太原以紅衣破攻之城圯
永福挾眾突出以蒙古兵迎戰多所斬馘獲馬千餘
又追敗賊將馬驥於黃河獲舟十有五明年隨都統
巴哈納進圍延安賊悉步騎出犯擊卻之復以入騎
躡自成獲其孥三年蘇尼特部騰機思等率所屬叛
奔喀爾喀豫親王多鐸奉

命集兵克魯倫河進討愛松古率前鋒兵扼險以待大軍騰
機思遁隨侍郎尼堪副都統明安遠理乘夜追擊獲
其輜重斬台吉茂海遂渡圖喇河而喀爾喀汗土謝
圖以兵二萬來拒隨鎮國將軍瓦克達等進戰敗其

騎兵逐北三十餘里以功予雲騎尉世職五年

命以蒙古兵六百駐防太原涇陽叛賊李陽糾眾二千來犯
擊敗其眾斬李陽又擊敗叛賊王享明於交城是時
叛鎮姜瓖據大同賊黨劉遷以眾萬餘將犯代州與
瓖犄角聞報疾率所部馳入代州偕遊擊高國棟以
守俄而遷薄城下樹雲梯將乘城禦之陣上斬賊三
百獲梯九賊益兵掘城城上矢石雜下賊多死遷走
繁峙明年賊潛來犯姦徒啟外郭門應之仍掘城固
守十數日端重親王博洛以兵來援擊敗圍賊斬其
渠郭芳遷遁亦引軍還太原而瓖黨十餘萬尋由清

源來犯與巡撫祝世昌議賊勢盛宜據險扼之毋令
至城下乃分遣將士赴清源徐溝遏賊會瑞重親王
接師至自晉陽賊眾敗竄七年論功兼遇

恩詔晉騎都尉世職兼一雲騎尉洵擢本旗叅占副都統九
年再遇

恩詔晉二等輕車都尉流賊張獻忠餘黨孫可望等寇掠湖
南隨敬謹親王往征師至衡州王沒於陳以沒大將
例降世職爲騎都尉兼一雲騎尉十六年致仕康熙
十四年卒

賜祭葬如故事子納青初以三等待衛於順治十六年從征

鄭成功至廈門先卒於軍孫瑪爾繼襲世職

喀山姓納喇氏世居葉赫部之蘇完當葉赫未滅挈

家屬來歸

太祖材之授佐領後隸滿洲鑲藍旗從取明瀋陽遼陽並有
功授輕車都尉世職天命九年明總兵毛文龍遣三
守備率兵百來奪額駙康克禮屯莊以所部禦之斬
守備二殲其眾天聰六年從征察哈爾部偕前鋒參
領勞薩參領吳拜等率精銳先驅察哈爾汗林丹遁
去八年追論覆毛文龍部眾功晉男爵尋以目失明
辭佐領順治二年

世祖念其舊勞晉爵一等七年九年三遇

恩詔晉爵二等子十二年卒

賜祭葬如故事諡曰敏壯於墓道立碑于納海襲爵自有傳
而先業赫未滅來歸隸滿洲正白旗者曰阿布岱舊
失其氏

太祖初以功任佐領授騎都尉世職列十六大臣從破烏喇
及征明遼東廣甯天聰七年從擊察哈爾部十年從
征朝鮮並有功晉世職輕車都尉後坐事仍降爲騎
都尉

納海初以父病目奉

命代管位領尋授前鋒參領天聰八年從征明大同偕參領
席特庫等率四十人擊陽和敵騎敗之斬級二百獲
馬六十餘仍設伏宣府擒敵哨騎九年大軍復征大
同奉

命駐兵上都城舊址偵報軍事與奏捷使者偕還尋同參領
鄂莫克圖等齎書

諭明喜峯口潘家口董家口諸守將及還斬其邊界哨卒百
數崇德二年偕席特庫齎書

諭明總兵祖大壽自廣甯入邊擒哨卒十二斬其九縱二人
使齎

敕書至錦州以其一還四年隨武英郡王阿濟格征明錦州
還奏所攻獲仍從

太宗親征至松山敵兵迎戰擊卻之祖大壽遣兵自甯遠來
援乘船趨杏山將入城偕前鋒參領瑚密色索渾率
兵襲擊其後斬五十人獲甲四十及船一旋與瑚密
色出杏山獲牛三十九羊三百餘復與前鋒統領席
特庫於錦州郊外獲敵樵採者二十二人及牲畜無
算明年大軍圍錦州敵出城築臺偕前鋒參領色赫
布丹蘇爾德擊斬四十人又要斬出城刈草者四十
二人既而敵以三百騎一再來犯並擊卻之尋與色

赫往小凌河遇祖大壽所遣蒙古十七人自錦州至
皆斬焉六年明經略洪承疇集援兵次松山偕前鋒
統領吳拜擊敗其騎兵

太宗統師親征駐松山敵犯我前鋒營偕諸參領合擊敵卻
去既而敵自杏山走塔山率兵邀擊追至筆架山斬
級四百擒二十八人獲馬二百餘擧肅六明年錦州
下累功予雲騎尉世職署前鋒統領隨貝勒阿巴泰
征明自黃崖口入長城趨薊州明總兵白騰蛟白廣
恩迎戰擊敗之遂略地山東明年凱旋以不俟左翼
軍先出邊右翼諸將並停敘功

世祖定鼎後三遇

恩詔晉世職輕車都尉父喀山卒襲二等子爵併爲二等伯
順治十七年卒弟納秦襲爵